

## ■ GLOSSA

# Dus tegnan vinavant la bandiera a Trump

DA SILVIO CAMENISCH

**O**je!, perfin republicans fin la crusta han survegnì che tarladescha e deserteschan uss en rotschas. Quels han ussa finalmain bittà la bandiera davant ils pes al sagloriader e tamberl mr. Trump. Quel ha tschantschà tschuf, en cabinas da sa stgamiar per umens, ha tschantschà maltgiert da dunnas cun lur vaginas e vulvas, uschè bellas, e che n'han fatg nagut dal mal al topfavurit republican Trump sco nov president dals Stadis Unids da l'America. Da quai n'han ellas betg merità, anzi, è mes maini.

**D**us «dals noss», omadus conuschents dretgs burgais or dal pievel, da sumeglianta pasta da republicans qua, tegnan vinavant ad aut la bandiera a Trump. Quai dastga il pievel schon savair, so, quai fashain nus da savair al pievel al pievel. In è Köppel, l'auter è Somm.

**N**oss Köppel declera mintga altra giada en ses predis Editorials, pertge che l'America duess, na, stuess eleger Trump. Tgi che na crai betg, legia la Weltwoche. E meglier èsi da crair al Köppel, betg studegiar, betg pensar sez. Quel «sa», auters san er, ma quel sa meglier. Dretgs predicatur n'han betg dubis. Jau bain. Quai ch'auters din u pretendan cuntradi Köppel immediat: «Das ist



falsch. Richtig ist, dass Trump ehrlicher heuchelt als Hillary.» Ah uschia. Gea lura èsi cler a tgi dar.

**I**n medem flister sabiut, sch'ins taidla, auda e crai a Markus Somm, chauredatur da la BaZ en «Standpunkte». La dumengia da l'ina, ch'ins avess detg ed avunda da digerir il brassà da dumengia e, tut lasuenter far in cupid cun u «senza una donna» (Zucchero), e quest Somm, cun ses nas da misarogn ed ureglias fitg spezialas, declera als Sanesters visavi pertge ch'ins duess, na, stuess dar la totala pussanza e la gloria a Trump: per impedir la «manzasa e cugliuna Hillary», uschè simpel è quai, di Somm.

**P**ertge far cumplitgà sch'i va simpel! Quels dus burgais senza starmet da la dretga persvadan mai tras e tras, Vus bain er? Che quels tegnan cun dus, na, quatter mauns la bandiera a mr. Trump, mussa character e di massa dad els, sche betg tut. Nagin character èsi

da bittar nà la bandiera, uss ch'i duvrass pir ch'inscur bandierels persvas ch'ardan da dadens anor en lur nobla funcziun. Köppel e Somm ardan da dadens anor anc per plunas auters gronds manaders da pievels: Bocher, Hofer, Assad, Putin, Orbàn, Erdogan, Kaczynski, Petry, Le Pen... («senza una donna» na vai er betg qua, na fiss la vita betg bella).

**V**egls amis da partida sa distanzieschan anc a temp. I dat per tut in temp. I dat in temp da sa far d'amis u almain far finta, so, uss vai per salvar l'agennum e la cravatta, anenvers sco anoravers. Sa mai, sch'ins al duvrass puspè, in'otra giada. Tge fauss amis da partida e da bandiera, bittar nà uschia, stagl ch'ins anzi tirass si ella pli aut, la bandiera! Wutbürger targessan si pli aut la Hillary, fiss la betg uschè greva. Köppel e Somm èn dretgs exempels e dretgs mussavias en temps uschia, mes maini. Tegni aut omadus, legi lur products stampads, tadlai lur predis.

**G**ist èsi vegnì en sur lasraits socialas da Robert De Niro («Der Pate 2») «stinksauer»: «Jau dess pli gugent ina en fatscha a Donald Trump.» Lain urar! Per ils Stadis Unids da l'America, quels san, sappia Dieu, duvra!

silvio.camenisch@bluewin.ch